

Die anders die geschriff vmb keren
Dann sie der heilg geist selb düt leren
Die hand eyn falsch wog in der hend
Vnd legen druff/ als das sie wendt
Machend eyns schwär/ das ander lycht
So mit der gloub yetz vast hyn zücht/
Inn mitt wir der verkeerten ston/
Jetz regt sich vast der scorpion
Durch sollch anreytzer/ von denen hett
Geseyt Ezechiel der prophet
Die überträtter des gesatz
Die süchen dem endkrist syn schatz
Das er hab ettwas vil entvor/
Wann schyer verlouffen sint syn jor
Vnd er vil hab die by jm ston
Vnd mit jm inn syn falscheyt gon/
Der würt er han vil inn der welt
Wann er vß teyken würt syn gelt
Vnd all syn schätz würt fürhar bringen
Darff er nit vil mit streichen zwynngen
Das merteyl/ würt selbs zü inn louffen
Durch geltt würt er vil zü jm kouffen
Die helfen jm / das er dann mag
Die güten bringen alle tag/
Soch werden sie die leng nit faren
Inn würt bald brechen schiff/ vnd karren
Wie wol sie faren vmb vnd vmb
Vnd würt die worheynt machen krumb
So würt zü letst doch worheynt bliben
Vnd würt jr falscheynt gantz vertriben

f .iiij.



man